

Uunga siunnersuut: Umiarsualiviit pillugit Inatsisartut inatsisaat nr. xx, xx. xx 2015-imeersoq**Kapitali 1***Atuuffia*

§ 1. Umiarsualivinnik nunami atortulersuutitalinnik usinik, inunnik, aalisakkanilluunniit tulaanneqartunik inuussutissarsiutigalugu assartuinnermut atorneqartunik sanaartorneq ingerlatsinerlu Naalakkersuisut akuersissuteqarnerisigut aatsaat pisinnaavoq, tak. § 5, umiarsualiviit nunami atortulersuutitalit § 2-mi taaneqartut eqqaassanngikkaanni.

Imm. 2. Naalakkersuisut malittarisassanik umiarsualiviit nunami atortulersuutitalit umiarsualiviillu imartaasa taakkununga atasut killilersorneqarnerannut atuuttunik aalajangersaasinnaapput.

§ 2. Inatsisartut inatsisaat manna umiarsualivinnut nunami atortulersuutitalinnut makkununga atuutinngilaq:

- 1) Sakkutuut Kalaallit Nunaanni suliaqarnerannut ilaatillugu taamaallaat Naalagaaffimmit atorneqartunut.
- 2) Aatsitassanik mineraliusunik misissueqqaarnissamut atuinissamullu akuersissummi Naalakkersuisut suliat taakku pillugit oqartussaasut suliarinninneranni tamarmiusumi ilaasutut tunniussaanni pineqartunut ilaatinneqartunut, taamaattorli tak. § 4.
- 3) Nunami tankeqarfinnut illoqarfinnik nunaqarfinnillu pilersuinnermi ilaallutik oliamik ikummatissamillu niiooraanermut atugassanngortinneqarsimasunut atorneqartunulluunniit, taamaattorli tak § 4.
- 4) Pituffimmi illersornissaqarfiup iluani inissisimasunut.
- 5) Inatsisartut inatsisaata matuma atortuulersinneqarnerani Kalaallit Nunaanni Namminersorlutik Oqartussanit kommuninilluunniit tamakkiisumik ilaannakortumilluunniit pigineqartunut.

§ 3. Inatsisartut inatsisaat manna umiarsualivinnut nunami atortulersuutitalinnut sungiffimmi siunertanut atorneqartunut atuutinngilaq.

Imm. 2. Umiarsualivik nunami atortulersuutitalik nassiussanik, inunnik aalisakkanilluunniit tulaanneqartunik inuussutissarsiutigalugu assartuinnermut tamatumunngalu peqatigitillugu sunngiffimmi siunertanut atorneqarpat atuneq tamarmiusoq § 1-imi pineqartunut ilaatinneqartutut isigineqassaaq.

§ 4. §§ 17 - 19 umiarsualivinnut nunami atortulersuutitalinnut § 8, imm. 2, nr. 2-mi, 3-mi, 5-imilu pineqartunut ilaatinneqartunut aamma atuupput.

Kapitali 2*Umiarsualivinnik nunami atortulersuutitalinnik*

sanaartorneq ingerlatsinerlu

§ 5. Umiarsualivinnik nunami atortulersuutitalinnik sanaartortoqarnissaa, allilerisoqarnissaa, allannortiterisoqarnissaa aamma atuineramik ingerlatsinermillu allannortitsisoqarnissaa Naalakkersuisut akuersissutigisinnaavaat, tak. § 1. Akuersissut kisermaassisinnaatitaanertut tunniunneqarsinnaavoq.

Imm. 2. Kommunit umiarsualivii nunami atortulersuutitalit pioreersut kommunip ataani ingerlanneqaannarnissaat akuersissutigineqarsinnaavoq. Kommunip umiarsualiveqarfiata pioreersup allilerneqarnissaanut, allannortiterneqarnissaanut imaluunniit allannguuteqartinneqarnissaanut akuersissummik Naalakkersuisut tunniussisinnaapput. Akuersissummut atugassarititaasussanik Naalakkersuisut aalajangersaasinnaapput. §§ 7 – 12 aammalu maleruagassat taanna malillugu aalajangersagaasut, kommunip piginnittuunerata ingerlatsineratalu malitsigisaanik pisariaqartunik allannguuteqartillugu naleqqussarneqartillugulu atorineqassapput.

§ 6. § 5, imm. 1 tunngavigalugu akuersissut umiarsualivinnik ingerlatseqatigiiffinnut Kalaallit Nunaanni angerlarsimaffeqartunut, piginneqataassuteqarluni (anpart) imaluunniit aktiaateqarluni ingerlatseqatigiiffittut aaqqissuussaasunut tunniunneqarsinnaavoq. Umiarsualivinnik ingerlatseqatigiiffiup taamaallat suliaqarnermik Inatsisartut inatsisaanni matumani pineqartumik ingerlatsinissamik siunertaqassaaq.

§ 7. Sanaartukkat piusut atortulersuutillu § 5, imm. 1 tunngavigalugu akuersissummi pineqartunut ilaatinneqartut piginnittuannut § 5, imm. 1 tunngavigalugu taamaallaat akuersissuteqartoqarsinnaavoq.

Imm. 2. § 5, imm. 1 tunngavigalugu akuersissummik piginnittup umiarsualiveqarnermut tunngasumik aningaasarsiutigalugu sulineq alla ingerlassinnaavaa, matumani umiarsualivimmi attaveqaatinik, quersuaqarfinnik pigisanillu aalaakkaasunik sanaartorneq, ingerlatsineq attartortitsinerlu ilanngullugit eqqarsaatigalugit.

Imm. 3. Naalakkersuisut § 5, imm. 1 tunngavigalugu akuersissummik piginnittoq sulineramik imm. 1-imi 2-milu taaneqartunit allaasumik aalajangersimasumik annertussusilimmik erseqqinnerusumillu piumasaaqateqarfiusumik ingerlatsinissaanut akuerisinnaavaat.

§ 8. Kommuni umiarsualivimmik ingerlatseqatigiiffimmi piginneqataassutinik pigisaqartutut peqataasinnaavoq, Naalakkersuisunit siumoortumik akuersissuteqarfigineqarnermigut. Naalakkersuisut kommunip peqataaneranut piumasaaqatit akuersissummi aalajangersassavaat, matumani kommunip piginneqataassutaasa annertussusissaat, aningaasanngorlugit siumut akiliutissai, aningaasalersuineq, aqutsineq allallu ilanngullugit eqqarsaatigalugit.

§ 9. Naalakkersuisut § 5, imm. 1 tunngavigalugu akuersissummik qinnuteqaatit niuerneramik ingerlatsinermut tunngaviusoq kiisalu niuernermit pilersaarussiaq, missingersuutit

anigaasalersuinissamillu neriorsuutit tassunga atasut pillugit uppernarsaatit tunngavigalugit suliarisarpaat.

Imm. 2. Akuersissummik qinnuteqartut akuersissummillu pigisaqartut paasissutissanik Inatsisartut inatsisaat manna tunngavigalugu oqartussaasup suliarinninneranut pisariaqartut Naalackersuisut isigisaannik tamanik Naalackersuisunut tunniussissapput.

Imm. 3. Naalackersuisut paasissutissanik nalunaarutiginnittarneq pillugu malittarisassanik aalajangersaasinnaapput, matumani § 5, imm. 1 tunngavigalugu akuersissummik qanoq ilusiliilluni qinnuteqartoqarsinnaanera pillugu malittarisassat ilanngullugit eqqarsaatigalugit.

§ 10. § 5, imm. 1 tunngavigalugu akuersissut tunniunneqarsinnaavoq, umiarsualivinni nunami atortulersuutitalinni anigaasaliissutit tamarmiusut usinik, inunnik, aalisakkanilluunniit tulaanneqartunik ingerlattanilluunniit allanik umiarsualivimmi sulianut attuumassuteqartunik pisariaqartitsinertut annertutigippata, tak. § 7, imm. 2.

Imm. 2. § 5, imm. 1 tunngavigalugu akuersissut sumiiffimmut aalajangersimasumut atuuttussatut tunniunneqassaaq. Akuersissummi umiarsualiviup inissisimanera, annertussusia, pisinnaasaqassusia il.il. pillugit aalajangersakkat aalajangersarneqassapput.

§ 11. § 5, imm. 1 tunngavigalugu akuersissut ukiuni 40-ni atuuttussatut tunniunneqarsinnaavoq, piffissap taassuma naanerani Namminersorlutik Oqartussanut tamakkiisumik piginnittussaataaffectartumik aammalu akeqanngitsumik utertinneqartussaataasumik. Piffissaq akuersissutip atuuffia ukiut 20-t tikillugit marloriarluni sivitsorneqarsinnaavoq. Naalackersuisut pisuni immikkut ittuni Inatsisartuni Anigaasaqarnermut Akileraartarnermullu Ataatsimiititaliap akuersineratigut ukiut 60-it angullugit taamatuttaaq piffissami sivisussusiligaanngitsumi akuersissuteqarsinnaapput. § 5, imm. 2 malillugu akuersissut, Namminersorlutik Oqartussanut utertitsisussaataaffectanngitsumik tunniunneqarsinnaavoq.

Imm. 2. Utertitsisussaataaneq pillugu malittarisassanik Naalackersuisut aalajangersaasinnaapput.

§ 12. Naalackersuisut piumasaqaatinik § 5, imm. 1 tunngavigalugu akuersissutini aalajangersaasinnaapput, ilanngullugit akuersissutininik atorunnaarsitsisarneq, akuersissutinik utertitsisarneq, umiarsualivimmik sanaartugartaqartumik taassumaluunniit ilaanik matusinermut imaluunniit piaanermut anigaasartuutitut qularnaveeqqusiissuteqartarneq pillugit atugassarititaasut.

Imm. 2. Naalackersuisut § 5, imm. 1 tunngavigalugu akuersissummut atugassarititaasut, taakkunanilu allannguutit pillugit malittarisassanik aalajangersaasinnaapput.

§ 13. § 5, imm. 1 aamma 2 tunngavigalugu akuersissummik pigisaqartup akuersissummi piumasaqaatit sumiginnarpagit/unioqqutippagit Naalackersuisut pissutsinik aaqqiisoqarnissaa peqqusissutigisinnaavaat imaluunniit umiarsualiviup nunami atortulersuutitallip matugallarneqarnissaa peqqusissutigisinnaallugu.

Imm. 2. Umiarsualivik nunami atortulersuutitalik atorneqarunnaarpat taassuma matugallarneqarnissaa Naalakkersuisut peqqusissutigisinnaavaat.

Kapitali 3

Umiarsualivinnik nunami atortulersuutitalinnik atuisinnaaneq atuinermullu akiliuteqartarneq

§ 14. § 5, imm. 1 aamma 2 tunngavigalugu akuersissumik pigisaqartup umiarsuit inissaqartitsinerup isumannaallisaanermilu isiginiagassat tamanna ajornartinngippassuk umiarsualivississallugit pisussaaffigaa, akuersissummi allamik aalajangersaasoqarsimanngippat.

Imm. 2. § 5, imm. 1 aamma 2 tunngavigalugu akuersissummik pigisaqartup umiarsuit usinik Kalaallit Nunaannut, Kalaallit Nunaannit Kalaallillu Nunaanni assartuinnermut akuersissummi pineqartunut ilaatinneqartut isumannaallisaanermi isiginiagassat tamanna ajornartinngippassuk umiarsualivississallugit pisussaaffigaa, tak. Kalaallit Nunaannut, Kalaallit Nunaannit Kalaallillu Nunaanni imaatigut assartuineq pillugu Inatsisartut peqqussutaat.

Imm. 3. § 5 tunngavigalugu akuersissummik pigisaqartup umiarsuit sakkutuunit Kalaallit Nunaata illersorneqarneranut ilaasunit atorneqartut isumannaallisaanermi isiginiagassat tamanna ajornartinngippassuk umiarsualivississallugit pisussaaffigaa.

§ 15. § 5, imm. 1 aamma 2 tunngavigalugu akuersissummik pigisaqartup umiarsuit umiarsuarnillu usingiaasartut usilersuinnermi usingiaanermilu pisariaqarneratut annertutigisumik namminerlu atortuutini atorlugit ikiussallugit pisussaaffigaa.

§ 16. Umiarsualivinnik ingerlatseqatigiiffiit umiarsualiviup nunami atortulersuutitalip atorneqarnerannut akiliutinik akiliuteqartitsisinnaapput.

Imm. 2. Akiliutit akiliuteqartitsinermilu tunngaviit umiarsualivinnik ingerlatseqatigiiffiit ataasiakkaarlutik sulineri tamarmiusut tunngavigalugit aalajangersarneqartassapput, matumani umiarsualivimmik nunami atortulersuutitalimmik pilersitsinermut, ingerlatsinermut, ernialersuinnermut nalikilliliinermullu aningaasartuutit ilanngullugit eqqarsaatigalugit.

Imm. 3. Akiliutit akiliuteqartitsinermilu tunngaviit kiisalu taakkunani allannguutit Naalakkersuisunit akuerineqartassapput. Akiliutit akiliuteqartitsinermilu tunngaviit allangortinneqassasut Naalakkersuisut piumasaqaatigisinnaavaat.

Imm. 4. Umiarsualivinnik ingerlatseqatigiiffiit pisussaapput paasissutissat akiliutit akiliuteqartitsinermilu tunngaviit akuerineqarnerinut allannguuteqarnerinullunniit atatillugu Naalakkersuisut pisariaqartutut isigisaat Naalakkersuisunut sukkullunniit nalunaarutigissallugit. Naalakkersuisut paasissutissanik taamaattunik nalunaaruteqartarneq pillugu malittarisassanik aalajangersaasinnaapput, matumani paasissutissat piffissani aalajangersimasukkaani nalunaarutigineqartarnissaat imaluunniit ilusiliussassatut piumasaqaatit aalajangersimasut naapertorlugit nalunaarutigineqartarnissaat ilanngullugit eqqarsaatigalugit.

Imm. 5. Umiarsualivimmik ingerlatseqatigiiffiit ingerlatat § 5, imm. 1-imi aamma § 7, imm. 2-mi 3-milu pineqartunut ilaatinneqartut pillugit naatsorsuusiortassasut Naalakkersuisut aalajangersinnaavaat. Naalakkersuisut naatsorsuutininik saqqummiussisarneq pillugu malittarisassanik aalajangersaasinnaapput.

Kapitali 4

Nunat tamat akornanni pisussaaffiit il.il.

§ 17. Naalakkersuisut pissutsit Inatsisartut inatsisaanni matumani pineqartunut ilaatinneqartut pillugit nunat tamat isumaqatigiissutaasa atortinneqarnissaat atorneqarnissaalluunniit siunertaralugu malittarisassanik aalajangersaasinnaapput aalajangiisinnaallutilluunniit. Naalakkersuisut peqqusissuteqartarneq inerteqquteqartarnerluunniit imaluunniit paasissutissiisussaataanerit pillugit malittarisassanik aalajangersaasinnaapput, malittarisassat taamaattut pissutsit Inatsisartut inatsisaanni matumani pineqartunut ilaatinneqartut pillugit nunat tamat akornanni isumaqatigiissutit atortinneqarnissaat atorneqarnissaalluunniit pisariaqartippassuk.

§ 18. Naalakkersuisut umiarsualiviit nunami atortulersuutitalit isumannaallisaavigineqarnerat pillugu malittarisassanik aalajangersaasinnaapput aalajangiisinnaallutilluunniit. Naalakkersuisut matumani ilanngullugu aalajangersinnaavaat umiarsualivinnik nunami atortulersuutitalinnik isumannaallisaaneq pillugu suliassat namminersortunit erseqqinnerusumik annertussusilikkamik suliarineqarsinnaasut.

Imm. 2. Kalaallit Nunaanni Namminersorlutik Oqartussani allanilu atorfeqartitaasut sanngiiffiusinnaasunik naliliiviginninnerit aamma isumannaallisaanermut pilersaarusiit suliarineqarnerini peqataasut, paasissutissanillu malittarisassat imm. 1 tunngavigalugu aalajangersarneqartut tunngavigalugit tigusaqartut pinerluttulerinermi inatsit tunngavigalugu pisussaapput paasissutissanik taakkuninnga susassaqaanngitsunut isertuussinissaminnut, taamaattorli tak. imm. 3.

Imm. 3. Paasissutissat Danmarkimi nunanilu allani oqartussaasunut nunallu tamat akornanni suliniaqatigiiffinnut ingerlateqqillugit tunniunneqarsinnaapput, tamanna Namminersorlutik Oqartussat nunat tamat akornanni pisussaaffiisa nassatarippassuk.

§ 19. § 5, imm. 1 aamma 2 tunngavigalugu akuersissummik pigisaqartut kiisalu umiarsualivinni piginnittoq § 2, nr. 2-mi, 3-mi, 5-imilu pineqartunut ilaatinneqartut pisussaapput malittarisassat aalajangersakkallu §§ 17 aamma 18 tunngavigalugit suliarineqarnerini aqunneqarnerinilu akeqaanngitsumik peqataanissaminnut. Pisussaaffeqarneq aammattaaq piginnittoq sinnerlugu umiarsualivimmik nunami sanaartugartalimmik ingerlatsinermik suliaqartumit pisussaaffeqarfigineqarpoq.

Kapitali 5

Namminersorlutik Oqartussat kommunillu umiarsualivii

§ 20. Naalackersuisut Namminersorlutik Oqartussat umiarsualiviisa nunami atortulersuutitallit aqunneqarnerat, aserfallatsaalineqarnerat ingerlanneqarnerallu pillugit aalajangersakkanik aalajangersaassapput.

§ 21. Namminersorlutik Oqartussat umiarsualivimmik nunami atortulersuutitalimmik atuinermut akiliutinik akiliisitsisinnaapput.

Imm. 2. Naalackersuisut umiarsualiviup nunami atortulersuutitallip ingerlanneqarneranut aserfallatsaalineqarneranullu aningaasartuutit tamakkiisumik ilaannakortumilluunniit matussutissaannik akiliutit akiliuteqartitsinermullu tunngaviit aalajangersarsinnaavaat. Umiarsualivinnut ataasiakkaanut akiliutit ataatsimoortillugit naliliivigineqassapput, matumani soorlu pilersuinerup isumannaatsuunera, nassiussatigut ilaasutigullu kaaviiartitat umiarsualiviullu najukkamat sumiiffigisaminut sunniutai ilanngullugit pingaartillugit isiginiarneqarsinnaallutik.

Imm. 3. Akiliutigineqartut pissutigalugit umiarsualiviit umiarsualivinnik piginneqatigiinnit pigineqartut aamma umiarsualiviit Kalaallit Nunaanni Namminersorlutik Oqartussanit pigineqartut unammilleqatigiinnerisa equinneqannginnissaat sapinngisamik annertunerpaamik qulakkeerneqassaaq.

Imm. 4. Imm. 2-3 kommunit umiarsualiviinut tamatuma pissuseqataanik atuupput, tak. § 5, imm. 2. Kommuni umiarsualiviup nunami atortulersuutitallip atorneranut akiliisitsisinnaavoq. Akiliutit akiliuteqartitsinermullu tunngaviit Naalackersuisunit aalajangersarneqassapput, tak. imm. 2.

§ 22. Umiarsualivinnut qitiusumik oqartussaaneq Naalackersuisuniippoq.

Imm. 2. Naalackersuisut suliffeqarfik inuit ataasiakkaat pillugit inatsiseqartitsineq tunngavigalugu pilersinneqarsimasoq umiarsualiveqarnermut imarsiornermullu tunngasunik ilisimasaqartoq Namminersorlutik Oqartussat umiarsualiveqarfianni ataatsimi arlalinniluunniit najukkami umiarsualiveqarnermut oqartussaaneermik isumaginninnissaanut piginnaatissinnaavaat. Naalackersuisut suliffeqarfik namminersortoq isumagisassamik taassuminnga ingerlatsinissamut pisussaaffilersinnaavaat.

Imm. 3. Imm. 2 tunngavigalugu najukkami umiarsualivimmut oqartussaasoq Naalackersuisut sinnerlugit aalajangiisinnaavoq, tamatumunnga ilanngullugu umiarsualiviup nunami atortulersuutitai ilanngullugit atornerarneranut akiliisitsisarnerup isumagineqarnera. Umiarsualivimmut qitiusumik oqartussaasup najukkami umiarsualivimmut oqartussaasoq naalakkissallugu piginnaatitaavoq taannalu nakkutigisaralugu.

Imm. 4. Naalackersuisut najukkami umiarsualivimmut oqartussaaneq pillugu malittarisassanik aalajangersaasinnaapput.

Imm. 5. Kommunit umiarsualiviini § 5, imm. 2 tunngavigalugu akuersissummik tunineqartuni umiarsualivimmut oqartussaaneq kommunalbestyrelsip isumagisaraa. Kommunalbestyrelsip najukkami umiarsualivimmut oqartussaaneq isumaqatigiissuteqarnermigut ingerlatseqatigiiffimmut imm. 2-4-mi aalajangersakkat tunngavigalugit isumagisassanngortissinnaavaa, tassami kommunalbestyrelsi Naalackersuisut sinnerlugit aalajangiisarmat.

Kapitali 6

Torersuutitsinissaq pillugu malittarisassat

§ 23. Naalackersuisut umiarsualivinni nunami atortulersuutitalinni torersuutitsinissap malinneqarnissaa pillugu malittarisassanik aalajangersaasinnaapput.

Imm. 2. Naalackersuisut umiarsualiviit nunami atortulersuutitalit ataasiakkaat eqqarsaatigalugit umiarsualivinnut ataasiakkaanut taakkunungarpiaq tunngasumik torersuutitsinissaq pillugu malittarisassanik aalajangersaasinnaapput.

Imm. 3. Naalackersuisut torersuutitsinissaq pillugu malittarisassat malinneqarnerat nakkutigisaraat.

Kapitali 7

Aalajangersakkat allat

§ 24. § 5, imm. 1 aamma 2 tunngavigalugu akuersissummik imaluunniit umiarsualivimmik nunami atortulersuutitalimmik § 5, imm. 1 aamma 2 tunngavigalugu akuersissummik pineqartunut ilaatinneqartumik allanut toqqaannartumik toqqaannangikkaluamillu isumagisassanngortitsinerit tamarmik Naalackersuisunit akuerineqartassapput.

Imm. 2. § 5, imm. 1 aamma 2 tunngavigalugu akuersissut taarsigassarsissutigineqarsinnaangilaq, qularnaveeqqusiunneqarsinnaananani imaluunniit akiitsoqarfiusut akiliisitsiniarneranni malersuissutigineqarsinnaananani.

Kapitali 8

Naammagittaalliortarneq

§ 25. Umiarsualivinni umiarsualivissiinissamik pisussaaffeqarfiusuni, tak. §§ 14 aamma 15, taliffissamik innersuunneqarneq kiisalu usilersornermi usingiarnermilu ikiorserneqarneq pillugit aalajangiinerit Naalackersuisunut naammagittaalliutigineqarsinnaapput.

Imm. 2. Imm. 1 tunngavigalugu naammagittaalliorsinnaatitaasut tassaapput pineqartut aalajangiinermi pisussaaffiligaasut imaluunniit aalajangiinermi namminneerlutik allatigut inatsiseqartitsinikkut soqutigisaqartuusut.

Imm. 3. Naammagittaalliornissamut piffissaliussaq aalajangiinerup naammagittaalliutigineqartup naammagittaalliorfigineqarsinnaasumit tiguneqarneranit sapaatit akunnerinik sisamanik sivilisussuseqarpoq.

§ 26. Najukkami umiarsualivimmuq oqartussaasup § 22, imm. 3 tunngavigalugu aalajangiineri Naalackersuisunut naammagittaalliutigineqarsinnaapput.

Imm. 2. Najukkami umiarsualivimmuq oqartussaasup § 22, imm. 5, tak. imm. 3, tunngavigalugu aalajangiineri kommunalbestyrelsimut naammagittaalliutigineqarsinnaapput.

Imm. 3. Imm. 1 aamma imm. 2 tunngavigalugit naammagittaalliorsinnaatitaasut tassaapput pineqartut aalajangiinermi pisussaaffiligaasut imaluunniit aalajangiinermi namminneerlutik allatigut inatsiseqartitsinikkut soqutigisaqartuusut.

Imm. 4. Naammagittaalliornissamut piffissaliussaq aalajangiinerup naammagittaalliuutigineqartup naammagittaalliorfigineqarsinnaasumit tiguneqarneranit sapaatit akunnerinik sisamanik sivilissuseqarpoq.

§ 27. Naalakkersuisut torersuutitsinissaq pillugu malittarisassat naapertorlugit aalajangiinerit naammagittaalliuutigineqarsinnaanerat pillugu maleruagassanik aalajangersaasinnaapput, tak. § 23. Umiarsualivinnut nunami atortulersuutitaqartunut § 5, imm. 1 naapertorlugu akuersissuteqartunut Naalakkersuisut naammagittaalliorarneq pillugu malittarisassanik aalajangersaasinnaapput, matumani allaffissornikkut aqutsinermi oqartussaasumut qulliunerusumut naammagittaalliorqarsinnaannginnissaa ilanngullugu eqqarsaatigalugu.

Kapitali 9

Pineqaatissiissutit atortuulersitsinerlu

§ 28. Kinaluunniit umiarsualivimmik nunami atortulersuutitalimmik § 1, imm. 1 tunngavigalugu akuersissummik pigisaqarani sanaartortoq ingerlatsisorluunniit Kalaallit Nunaanni pinerluttulerinermik inatsimmi malittarisassat tunngavigalugit pillammik akiliisussanngorlugu, pisinnaatitaaffimminik annaasaqartussanngorlugu pigisanillu arsaarneqartussanngorlugu eqqartuunneqarsinnaavoq.

Imm. 2. Kinaluunniit umiarsualivimmik nunami atortulersuutitalimmik § 5, imm. 1 aamma imm. 2 tunngavigalugit akuersissut unioqqutillugu sanaartortoq unioqqutitsisorluunniit Kalaallit Nunaanni pinerluttulerinermik inatsimmi malittarisassat tunngavigalugit pillammik akiliisussanngorlugu, pisinnaatitaaffimminik annaasaqartussanngorlugu pigisanillu arsaarneqartussanngorlugu eqqartuunneqarsinnaavoq.

§ 29. § 13, imm. 1-2-mik, § 16, imm. 3-mik aamma § 24, imm. 1-imik unioqqutitsisoq Kalaallit Nunaanni pinerluttulerinermik inatsimmi malittarisassat tunngavigalugit pillammik akiliisussanngorlugu, pisinnaatitaaffimminik annaasaqartussanngorlugu pigisanillu arsaarneqartussanngorlugu eqqartuunneqarsinnaavoq.

§ 30. Malittarisassanik § 1, imm. 2, § 9, imm. 3, § 11, imm. 2, § 12, imm. 2, § 16, imm. 4-5, §§ 17-18, § 22, imm. 4 aamma § 23, imm. 1-2 tunngavigalugit aalajangersarneqarsimasunik unioqqutitsisoq Kalaallit Nunaanni pinerluttulerinermik inatsimmi malittarisassat tunngavigalugit pillammik akiliisussanngorlugu, pisinnaatitaaffimminik annaasaqartussanngorlugu pigisanillu arsaarneqartussanngorlugu eqqartuunneqarsinnaavoq.

Imm. 2. Inatsisartut inatsisaat manna malittarisassalluunniit Inatsisartut inatsisaat manna tunngavigalugu aalajangersarneqarsimasut pillammik akiliisussanngortitsilluni,

pisinnaatitaaffinnik annaasaqartussanngortitsilluni pigisanilluunniit arsaarneqartussanngortitsilluni eqqartuussinissamut tunngavissaliippata inuit inatsiseqartitsinikkut nammineertutut isigineqartut Kalaallit Nunaanni pinerluttulerinermik inatsimmi malittarisassat tunngavigalugit pineqaatissinneqarsinnaapput.

Imm. 3. Inatsisartut inatsisaannik matuminnga malittarisassanilluunniit Inatsisartut inatsisaat manna tunngavigalugu aalajangersarneqartunik unioqquitsinerit pillugit suliat Kalaallit Nunaata eqqartuussivianut suliarinnittussatut siulliusumut suliassanngortinneqassapput.

Imm. 4. Inatsisartut inatsisaat malittarisassalluunniit Inatsisartut inatsisaat tunngavigalugu aalajangersarneqarsimasut tunngavigalugit pillaaammik akiliisitsissutit arsaarinnissutillu Kalaallit Nunaata Karsianut nakkartinneqassapput.

§ 31. Inatsisartut inatsisaat manna 1. januar 2015-imi atortuulersinneqarpoq. Tamatumunnga peqatigitillugu Namminersornerullutik Oqartussat umiarsualiviinik sanaartorneq, aserfallatsaaliineq, ingerlatsineq il.il. pillugit Inatsisartut peqqussutaat nr. 4, 29. oktober 1999-imeersoq atorunnaarsinneqarpoq.

Imm. 2. Umiarsualivinni oqartussaanermik atortitsineq pillugu Namminersornerullutik Oqartussat nalunaarutaat nr. 14, 14. maj 2002-meersoq aamma umiarsualivinni malittarisassat pillugit Namminersornerullutik Oqartussat nalunaarutaat nr. 1, 4. januar 2000-meersoq, maleruagassanik Inatsisartut inatsisaanni matumani imaluunniit Inatsisartut inatsisaanni allani tunngaveqartumik aalajangersagaasunik taarseneqarnissamik imaluunniit atorunnaarsinneqarnissamik tungaanut atuutiinnassapput.

Namminersorlutik Oqartussat, ulloq xx. xx 2015

Kim Kielsen